



IERANSKINA

ARTE ESZENIKO ETA MUSIKALETAN PRESTAKUNTZA-EKINTZAK EGITEKO LAGUNTZEN 2025EKO DEIALDIA

1.artikulua. Xedea eta helburua

Deialdi honen xedea da dirulaguntzak ematea pertsona fisikoei, arte eszeniko (antzerkia, zirkua, mimoa eta antzeko diziplinak) eta musikalen arloetako banakako espezializazio trebakuntza sustatzeko, hain zuzen toki hauetan egiten dena: unibertsitateak, goi eskolak, nazioarteko eskolak, goi mailako kontserbatorioak, dantza eskolak, antzerki eskolak, zirku eskolak eta, oro har, artearen arloko trebakuntza zentroak, Euskal Autonomia Erkidegotik kanpo daudenak.

Berariaz kanpoan uzten dira oinarritzko prestakuntzako ikasketa arautuei lotutako proiektuak edo eszenaratzea edo muntaketa dakartenak.

Deialdia bat dator Kultura eta Kirol Sailak lehiaketa bidez emango dituen dirulaguntzak arautuko dituzten oinarri orokorrak onetsi zituen Foru Gobernu Kontseiluaren azaroaren 12ko 50/2019 Foru Dekretuan (2019ko azaroaren 20ko ALHAO, 134. zenbakia) xedatutakoarekin. Dekretu hori Foru Gobernu Kontseiluaren martxoaren 2ko 7/2021 Foru Dekretuak aldatu zuen (2021eko martxoaren 10eko ALHAO, 28. zenbakia).

2.artikulua. Laguntzak emateko prozedura

Laguntzak norgehiagoka bidez emango dira. Dirulaguntzak emateko, aurkeztutako eskaerak ezarritako balioespen irizpideen arabera alderatuko dira, eskaeren arteko hurrenkera ezartzeko. Espezialitate bakoitzean balioespen handiena lortu dutenei emango zaie dirulaguntza, betiere deialdian ezarritako aurrekontu zuzkiduraren zenbatekoa gainditu gabe.

3.artikulua. Aurrekontu egozpena

1. Laguntza hauek emateko aurrekontu muga 25.000,00 eurokoa da, gastu hori babesten duen aurrekontu-partida hauxe da: 70105.G/334700/48000702 “Bekak: arte trebakuntza eta sorkuntza”, Arabako Foru Aldundiaren 2025eko Gastuen Aurrekontukoa.

2. Aurrekontu-muga hori hiru espezialitatetan banatuko da, honela:

- a) Formazioak Musikan eta Kantuan: 15.000,00 euro
- b) Formazioak Arte Eszenikoetan: 5.000,00 euro
- c) Formazioak Dantzan: 5.000,00 euro

Oinarri orokor arautzaileen 7.1 apartatua betez (Gobernu Kontseiluaren azaroaren 12ko 50/2019 Foru Dekretua), funtsak modalitateen artean banatu ahal izango dira, betiere prestakuntza-mota bakoitzari esleitutako kopuruaren muga eta deialdiaren aurrekontu osoa errespetatuz.





4.artikulua. Laguntza motak eta gehieneko zenbatekoak

Deialdi honek laguntza mota hauek hartzen ditu barnean, zenbatekoari eta gauzatze tokiari dagokienez:

- Atzerrian espezializatzeko laguntza: 5.000,00 euro gehienez.
- Euskal Autonomia Erkidegotik kanpo eta Estatuan espezializatzeko laguntza: 3.000,00 euro, gehienez.

Laguntzak 250 ordutik gorako iraupena duten prestakuntza espezializatuko proiektuei emango zaizkie. Ordu-kopuru hori 2025. urtearen barruan egin beharko da.

5.artikulua. Onuradunak eta baldintzak

Honako ezaugarri hauek dituzten pertsona fisiko guztiek parte hartu ahal izango dute deialdi honetan:

- 18 urte edo gehiago izatea, 2025eko abenduaren 31n.
- 2025eko urtarrilaren 1ean 30 urte beteta ez izatea.
- 2025eko urtarrilaren 1ean, azken bi urteetan Arabako Lurralde Historikoko eta/edo Trebiñuko enklabea edozein udalerritan etenik gabe errolatuta egon izana, laguntzaren xede den prestakuntza egiten den lekura aldatzeagatik erroldan baja ematea izan ezik, eta egoera hori agiri bidez justifikatu beharko da.

Ezin izango dira laguntza hauen onuradun izan aurretik espezialitate bererako bi aldiz jaso dituzten pertsonak.

Halaber, ezin daitezke laguntza hauen onuradun izan Arabako Lurralde Historikoaren Dirulaguntzei buruzko urriaren 19ko 11/2016 Foru Arauak 12.2. artikuluan jasotako egoeretakoren batean daudenak.

6.artikulua. Aurkeztu beharreko agiriak

Laguntza hauek eskuratzeko interesa duten pertsonak, eskaeraz gain, ondoko agiri hauek aurkeztu beharko dituzte,;

- a) Laguntza eskatzen duen pertsonaren curriculum vitae-a, eskaeraren xede den jakintza arloko trebakuntza eta espezializazioari eta esperientziari buruzko egiaztagiri egokiak erantsita.
Zerrendatu bai baina agiririk erantsi ez zaien ekintzak ez dira kontuan hartuko.
- b) Garatu beharreko trebakuntza proiektuaren azalpen memoria.
- c) Laguntza eskaeraren xedea den trebakuntzan onartua izan dela dioen ziurtagiria.

7.artikulua. Eskaerak aurkeztea eta epea

1. Deialdi honetara aurkeztu nahi duten pertsonak honako modu hauetako batean aurkeztu ahal izango dute eskabidea:

- a. Bitarteko elektronikoak erabiliz, Arabako Foru Aldundiaren egoitza elektronikoa horretarako dagoen inprimakia betez. Horretarako, aldeztu aurretik, eskatzaileek Arabako Foru Aldundiak onartutako ziurtagiri elektronikoren bat eduki beharko dute. Informazio gehiago: <https://egoitza.araba.eus/eu/egoitza-elektronikoa/ezagutu-egoitza/nola-sartu>



- b. Aurrez aurre Arabako Foru Aldundiaren Erregistro Orokorrean (Probintzia Plaza, 5, behe) edo Administrazio Publikoen Administrazio Prozedura Erkidearen urriaren 1eko 39/2015 Legearen 16. artikuluan aurreikusitako beste moduetan.

Atal honetan jasotako moduan aurkeztutako eskabideak deialdi honen II. eranskineko eredura egokitu beharko dira.

2. Onuradunek egunean izan beharko dituzte zerga-betebeharrak. Arabako Foru Aldundiak ofizioz egiaztatuko du pertsonen baldintza hori betetzen dutela, bai eta eskatzailearen nortasun eta errolda datuak ere. Egiaztapen horien aurka eginez gero, egitate horien egiaztapenak aurkeztu beharko dituzte, 39/2015 Legearen 28.2 artikulua arautzen duen bezala (Datu Pertsonalak Babesteari eta Eskubide Digitalak Bermatzeari buruzko abenduaren 5eko 3/2018 Lege Organikoak aldatua, azken xedapenetako hamabigarrenean).

3. Eskaerak aurkezteko 15 egun balioduneko epea egongo da deialdi hau ALHAOn argitaratu eta hurrengo egunetik aurrera kontatuta.

4. Eskaerak forma egokian aurkeztu ezean, edo deialdi honetan eskatutako agiriren bat falta bada, errekerimendua egingo zaio interesdunari 10 eguneko epean falta diren datuak eta agiriak aurkezteko. Adierazi den epean hala egiten ez badu, bere eskaerari uko egiten diola iritziko da, eta artxibatu egingo da, dagokion ebazpena eman ondoren.

5. Pertsona berak deialdi honetan bideratutako laguntza bakarra eskatu ahal izango du.

8.artikulua. Prozedura izapidetzea eta balioespen irizpideak

1. Arabako Foru Aldundiko Kultura eta Kirol Saileko Kultura Ekintza Zerbitzua izango da prozedura izapidetzeko organo eskuduna.

2. Hauek izango dira balioespen irizpideak bi espezialitateetarako:

- a) Eskatzailearen curriculum vitae: gehienez 70 puntu lortu ahalko ditu, honela banatuta:
 - 30 puntu, gehienez ere: laguntza eskaeraren xedea den arloko trebakuntzaren balioespena.
 - 40 puntu, gehienez ere: laguntza eskaeraren xedea den arloko esperientziaren eta hartan egindako jardueren balioespena.
- b) Egingai den proiektuaren interesa: 30 puntu emango dira, gehienez ere.

Dirulaguntza lortzeko gutxienezko puntuazioa 40 puntukoa izango da.

9.artikulua. Ebazpena eta jakinarazpena

1. Balioespen batzorde batek egingo du laguntzak emateko proposamena. Batzorde horren osakeran, Emakumeen eta Gizonen Berdintasunerako eta Emakumeen aurkako Indarkeria Matxistatik gabeko Bizitzetarako Legearen testu bategina onesten duen martxoaren 16ko 1/2023 Legegintzako Dekretuaren 3.10 artikulua hartuko da kontuan. Honako hauek osatuko dute batzordea:



- Batzordeburua: Kultura zuzendaria edo hark eskuordetutako pertsona.
- Batzordekideak: Kultura Ekintza Zerbitzuaren burua edo hark eskuordetutako pertsona eta Kultura Zuzendaritzari atxikitako bi teknikari.
- Idazkaria: Kultura eta Kirol Saileko Idazkaritza Teknikoko Zerbitzuko burua edo hark eskuordetutako pertsona, hitza izango du, baina botorik ez.

2. Eskabideak balio judizio baten mende dauden irizpideen arabera ebaluatzeko, balioespen batzordean aditu profesional independenteek parte hartu ahalko dute. Aditu horiek erantzukizunpeko adierazpen bat aurkeztu beharko dute, honako hauek adieraziz: Sektore Publikoaren Araubide Juridikoaren urriaren 1eko 40/2015 Legean aurreikusitako abstentzio kausetan ez daudela sartuta, konfidentzialtasuna bermatzen dutela, emandako dokumentazioa ez dutela erabiliko proiektuen balioespena ez den beste helburu baterako, deialdi honetan ezarritako irizpideen arabera, eta, ebazpen proposamena eman ondoren, espedienteetako dokumentazio guztia suntsitu egingo dutela, edo jatorrizkoak badira, prozeduraren instrukzio organoari itzuliko diotela. Izendapen horiek Kultura eta Kirol Saileko diputatuaren ebazpen baten bidez onetsiko dira, eta ebazpen hori ALHAOn argitaratuko da, interesdunek errefusatzeko duten eskubidea baliatu ahal izan dezaten, lege ezarritako egoera eta baldintzetan.

3. Batzorde horrek, aurkeztutako eskaeren balioespena ikusita, beka hauek guztiz edo partzialki esleitu gabe uztea proposa dezake.

4. Balioespen batzordeak txosten bat egingo du, non jasoko baita onuradun izateko baldintzak betetzen dituzten eskaera guztien zerrenda ordenatua. Zerrenda hori erabili ahal izango da, baldin eta onuradunetako batek hasieran uko egiten badio, laguntza onartzen ez badu edo emandako laguntza justifikatzen ez badu

Berdinketa gertatuz gero, lehentasuna izango dute azken hiru ekitaldietan sail honen laguntzarik jaso ez duten pertsonak aurkeztutako eskaerek. Berdinketak jarraitzen badu, honako irizpide hauen arabera lehenetsiko dira eskabideak, hurrenkera honetan:

- Interesdunaren curriculumaren balorazioan puntuazio handiagoa izatea.
- Eskatzaileak emakumeak izatea.

Espezialitate bakoitzaren barruan, laguntza jaso dezakeen azken eskatzailea ezin bada diruz lagundu bere gehieneko zenbatekoan, behar besteko diru-esleipenik ez duelako, espezialitate horretan esleia daitekeen gainerako zenbateko ekonomikoarekin lagunduko da.

Laguntza ordezkio bati esleitu behar bazaio, espezialitate bakoitzeko hurrengo eskatzailea izendatuko da, epaimahaiak ezarritako lehentasun-ordenaren arabera. Hori egingo da, baita ere, eskatzaileak espezialitate desberdinetako beste eskatzaile batzuek baino puntuazio txikiagoa lortu badu, puntuazioak modu independentean hartzen baitira aintzat espezialitate bakoitzaren barruan.

Modaliteren batean eskatzailerik ez badago edo batek ere ez badu gainditzen laguntza lortzeko behar den gutxieneko puntuazioa, epaimahaiak erabaki arrazoitu bat hartuko du laguntzak emateko ordenari buruz.

5. Deialdi honetako beken emakida Kultura eta Kirol Saileko diputatuaren Foru Agindu baten bidez ebatziko da, ikusita zer dioen balioespen batzordearen txostenak, eta onuradunei haren berri emango zaie, Administrazio Publikoen Administrazio Prozedura Erkidearen urriaren 1eko 39/2015 Legeak 42. eta 43. artikuluetan xedatutakoaren arabera.

Beka eskaerak gehienez ere sei hilabeteko epean ebatziko dira, deialdia ALHAOn argitaratu eta hurrengo egunetik aurrera. Epe hori igaro eta eskaerari buruzko esanbidezko ebazpenik eman ez bada,



ulertuko da eskaerari ezezkoa eman zaiola, nahiz eta ondoren ebazpena eman ahal izango den.

10.artikulua. Laguntza ordaintzea

1. Laguntzari dagokion PFEZaren atxikipena egingo zaio, eta ordainketa honela egingo da:

- a) Zenbatekoaren ehuneko 70a, laguntza ematen den unetik aurrera.
- b) Gainerako ehuneko 30a, gauzatutako proiektuari buruzko memoria aurkezten denean.

2. Proiektuaren zuzendaritzaz arduratzen den pertsonak edo erakundeak emandako ebaluazio-ziurtagiria aldekoa ez bada, ez da bigarren entrega egingo, eta lehenengo entregan jasotako zenbatekoa itzuli beharko da, eranskin honen 13. artikuluaaren arabera.

11.artikulua. Laguntzen onuradunen betebeharrak

Beka hauek eskuratzeko eskaerak aurkezteak berekin dakar deialdi honetan ezartzen diren arauak espresuki eta baldintzarik gabe onartzen direla. Horrez gain, hauek dira onuradunen betebeharrak:

- a) Arabako Lurralde Historikoaren Dirulaguntzen urriaren 19ko 11/2016 Foru Arauak 13. artikuluan oro har ezarritakoak.
- b) Berariaz jakinarazi behar da emandako laguntza onartzen dela, hura emateko jakinarazpena jasotzen denetik hamabost egun baliouduneko epean. Epe horretan laguntza onartzen ez bada, laguntzari uko egin zaiola ulertuko da.
- c) 2025eko abenduaren 9ra arteko epea izango dute egindako lanari buruzko amaierako memoria aurkezteko. Horren barruan, besteak beste, proiektuaren zuzendaritzaren ardura duen pertsonak edo erakundeak emandako asistentzia ziurtagiria jaso beharko da, proiektuak irauten duen ordu kopurua adierazten duena, eta baita pertsona edo erakunde horrek emandako aldeko ebaluazio ziurtagiri bat ere.
- d) Egindako jardueri buruzko datuak eta agiriak eman behar dituzte, Kultura eta Kirol Sailak hala eskatzen dienean. Era berean, Ogasun, Finantza eta Aurrekontu Sailak, Kontuen Epaitegiak edo beste erakunde eskudun batzuek eskatutako informazioa ere emango dute.
- e) Onuradun guztiek konpromisoa hartzen dute bekaren gaiari buruzko kontzertu, ekitaldi eta abarretan profesionalki parte hartzeko, gutxienez behin eta Foru Aldundiarekin adostu ondoren, horregatik inolako kontraprestaziorik jaso gabe.

12.artikulua. Bateriaezintasunak

Deialdi honetako laguntzak bateragarriak dira proiektu bererako jaso daitezkeen beste batzuekin. Dena den, laguntza hau eman aurretik, inguruabar horien berri eman eta berariazko baimena eskatu behar zaio Kultura Zuzendaritzari.

Bekaren zenbatekoa, bakarka hartuta edo beste dirulaguntza, laguntza, diru-sarrera edo baliabide batzuekin batera, ezin izango da diruz lagundutako jardueraren kostua baino handiagoa izan.

13.artikulua. Dirulaguntza itzultzea

Esleitutako dirulaguntzak itzuli egin beharko dira Arabako Lurralde Historikoaren Dirulaguntzei buruzko urriaren 19ko 11/2016 Foru Arauak ezarritako kasuetan.

Onetsitako dirulaguntzaren kontura jasotako kopuruen itzulketa zuzenbide publikoko diru sarreratzat



hartuko da eta haren kobrantza Ekonomia eta Aurrekontu Araubidearen 18ko 53/1992 Foru Arauak II. tituluko I. kapituluaren aurrekustuen duenarekin bat etorritik egingo da.

14.artikulua. Interpretazioa

Eranskin honetan xedatutakoaren interpretatzerakoan zalantzaren bat sortuz gero, Arabako Foru Aldundiaren Kultura eta Kirol Sailak ebatziko du.

15.artikulua. Publizitatea

Deialdi hau ALHAOn argitaratuko da. Halaber, www.araba.eus eta www.kulturaraba.eus web orrien bidez ere zabalduko da.

16.artikulua. Azken klausula

Deialdi honetan xedatuta ez dagoen guztian, honako hauei jarraituko zaie:

- Urriaren 19ko 11/2016 Foru Araua, Arabako Lurralde Historikoaren Dirulaguntzena,
- Urtarrilaren 25eko 3/2023 Foru Araua, Aurrekontuei buruzkoa,
- Aurrekontua Gauzatzeko Foru Araua, indarrean dagoena,
- Urriaren 1eko 39/2015 Legea, Administrazio Publikoen Administrazio Prozedura Erkidearena,
- 3/2007 Lege Organikoa, Gizonen eta Emakumeen Berdintasun Eragingarritasuna,
- 1/2023 Legegintzako Dekretua, martxoaren 16koa, Emakumeen eta Gizonen Berdintasunerako eta Emakumeen aurkako Indarkeria Matxistatik gabeko Bizitzetarako Legearen testu bategina onartzen duena,
- Aplikatu beharreko araudi guztia.